



*Jumat, 11 Juni 2021*  
**Ogen: Esekiel3:1-3**



**Entebu Bagi Tengguli**



“Tuhan yang mengutus, Tuhan yang memperlengkapi,” kalimat enda me si jadi man Esekiel selaku nabi Tuhan. Esekiel isuruh Tuhan ngelai bangsa Israel si pemberontak, guna sie iajuk Esekiel segelah ula mbiar ngalaken bangsa enda aminna pe melala runggga si man alankenna. Ieteh Tuhan ise si man alanken Esekiel, emaka sope denga ia ngelai selaku nabi ku bangsa e, Tuhan enggo leben mperlengkapi suruh-suruhanNa. Nina Tuhan man Esekiel “O manusia si ermasap- masap, pan gulungen enda, kenca bage to ngeranalah kempak bangsa Israe.” Teridah Tuhan ermediate man suruh-suruhenna, seh maka Tuhan ikuhina kai si iperluken Esekiel, dengen mereken pangan si jadi isi beltek guna gegehna erdahin. Kenca ipanken Esekiel pangan e, eme Kata Dibata idatna me nanamna **entebu bagi tengguli**. Esekiel meteh nanam pangan e kenca ia nggit man kai si ibereken Tuhan e.

Entebu bagi tengguli e gambaren pasu-pasu Tuhan. Bangsa Israel ibaba ndarat i Mesir nari ku Tanah Kanaan si mbue i je anggur ras tengguli bage me pasu-pasu Tuhan e. Bagi si eteh maka tengguli e pangan si menyehatkan, memperkuat antibodi, meningkatkan imun tubuh, maba kemalemen ate, kejuah-juahen dengen kepentaren.

Bage pe Dibata mereken undang-undangNa man banta. Kata Dibata e entebu bagi tengguli nanamna. Uga carana kita ngenanamisa? aloken ras panken kata e. Sabap labo banci si eteh nanamna sada pangan adi la sipan. Isilah geluhta alu Kata Dibata, tep-tep warina sabap kata e mereken kepentaren bage pe mpegegehi kita i bas ngalaken situasi sulit si ngancam geluhta. Kata Dibata desken pangan si erbahan kula ras perukurenta sehat. Isilah kula ras perukurenta tep-tep warina alu kerina pangan si sehet eme kata Dibata.